

ննից: Բազմաթիվ էին նաև ոչ արքունական գյուղերում բանող ձիթահանքերը: Ինչպես չաղացները, նույնպես և սրաննիցները կազմում էին մասնավոր անհատների և ընտանիքների սեփականություն: Սրանց մեջ իր ընդարձակությամբ և հաստահիմն կառուցվածքով, ինչպես և արտադրանքի ծավալով աչքի էր ընկնում Տաթևի վանքին պատկանողը: Սա սպասարկում էր նաև շրջակա մի շարք գյուղերին և մեծ եկամուտ էր տալիս վանքի միաբանությանը:

Տաթևի սրաննիցը տիպիկ էր ոչ միայն Զանգեզուրի, այլև հարևան հայաբնակ գավառների համար: Գրականության մեջ կա Գանձակի նահանգի Գետաշեն (Չալքենդ) գյուղի սրաննիցի նկարագրությունը⁸⁷: Նա իր տեխնիկական սարքավորումով շատ չնչին մանրամասնություններով էր տարբերվում Տաթևի վանքինից:

Տաթևի սրաննիցը կառուցված էր վանքի պարիսպներից դուրս, անշուշտ այն նկատառումով, որ մասնավոր պատվիրատուները կարողանան ազատ ելևմուտք ունենալ, առանց վանքի ներքին կյանքը խանգարելու: Դա տաշած քարերով խնամքով շարված շենք էր՝ երեք հիմնական բաժիններից բաղկացած: Առաջին բաժինը մի երկար ընդարձակ սրահ էր, որի մեջտեղ հենց դռան առջև ցածրիկ պատով օղակաձև շրջապատված կալն էր կամ բակը⁸⁸: Կալի կենտրոնում ցցված էր ամուր կիսասյուն՝ 70—75 սմ բարձրությամբ, որի գլխին նստեցրած էր երկար հաստ ձող՝ նէտ, մի ծայրը երկար, մյուսը կարճ: Երկար ծայրը դուրս էր գալիս կալի օղակավորող պատի սահմաններից, կարճը՝ ոչ: Երկարը հարմարեցրած էր եզ կամ գոմեշ լծելու⁸⁹ կամ մարդկանց ուժով առաջ մղելու համար: Կարճը ծառայում էր որպես առանցք ուղղահայաց կանգնեցրած ահագին և հաստ, 1,40 մ տրամագծով, 0,50 մ հաստությամբ երկանաքարի՝ ֆառաղի համար: Երկանաքարը գլորվելիս իր եզրի ամբողջ լայնությամբ ընդհուպ պառկում էր հատակին: Սրահի աջակողմյան նեղ պատի տակ սարքված էր բարձր քարաշեն բովաբան, ուր բարձրանում էին մի քանի աստիճաններով: Բուն բովաբանը մի քառակուսի ավազան է, որի հատակն ամբողջական բարակ սալ էր՝ սաջ: Սալը տաքացվում էր տակից հնոցի մեջ վառվող փայտով: Մուխը հեռացվում էր պատի մեջ շինված ծխաճալ: Կտավհատը նախ խանձվում էր այդ բովաբանի մեջ, սաջի վրա և ապա տեղափոխվում էր կալը՝ բակը և փոխվում երկանաքարի տակ: Նէտի երկար ծայրը լծված եզան կամ գոմեշի ուժով, կամ մի քանի մարդու բրդելով, առաջ էր շարժվում, իսկ կարճ ծայրին երկանաքարը սկսում էր հակառակ ուղղությամբ գլորվել՝ սելլավ՝ տրորելով կտավհատը: Ստացված ալյուրը մաղում էին և նորից փոստ՝ երկանաքարի տակ, այս անգամ խառնելով տաք ջրի հետ: Նորից քարի տակ տրորելուց հետո ստացվում էր խմոր, որն անցնում էր երկրորդ սրահը, որտեղ քամվում էր ճնշող մամուլի օգնությամբ:

Երկրորդ սրահի հատակը զանազան բարձրություն ունեցող երեք հրապարակների էր բաժանվում: Դռնից ձախ կողմում ամենացածրագիր հրապարակն⁹⁰ է, միջինը նրանից մի աստիճան բարձր է, իսկ աջակողմյանը՝ նեղ պատի տակինը, քարաշար թումբ է, ուր բարձրանում են մի քանի աստիճան-

⁸⁷ Джебейранов Ф., Сел. Чайкенд Елисаветпольск. уезда той же губ., [СМОМПК. вып. XXV, отд. II, էջ 77:

⁸⁸ Գետաշենում՝ սելան:

⁸⁹ Եզների և գոմեշների համար որպես բովա՝ գոմ ծառայում էր երրորդ բաժինը, որտեղ պատի տակ շինված էին մսուրներ:

⁹⁰ Գետաշենում՝ մքին տուն: